

AL-HIKMAH

Jilid	10	ISSN 1985-6822	2018
No.	2		1440

- KONSEP MORAL DALAM PERSPEKTIF ISLAM DAN BARAT...3-16
Nurul Hudani Md. Nawi & Baharudin Othman
- BENTUK KOMUNIKASI PENGAJARAN DALAM PENGAJIAN TAKMIR DI INSTITUSI MASJID: SATU TINJAUAN LITERATUR...17-34
Abd Hadi Borham, Mohamad Marzuqi Abdul Rahim, Wahyu Hidayat Abdullah, Abdul Ghafar Hj. Don & Nurfatin Afiqah Halidi
- SUMBANGAN ORANG ARAB TERHADAP PERKEMBANGAN PENDIDIKAN MADRASAH ATAU SEKOLAH ARAB DI MALAYSIA ...35-53
Latifah Abdul Latiff, Siti Nor Azhani Mohd Tohar, Farah Laili Muda @ Ismail & Anita Ismail
- ELEMEN *SIYASI* DALAM HURAIAN HADIS GERAKAN DAKWAH: PENDEKATAN SAYYID MUHAMAD NUH (1946-2007) ...54-69
Muhammad Arif Yahya
- PENGURUSAN DAKWAH ORANG ASLI OLEH MAJLIS AGAMA ISLAM DAN ADAT ISTIADAT ORANG MELAYU KELANTAN (MAIK) ... 70-85
Yasmon Mohamed, Razaleigh Muhamat@Kawangit & Abdul Ghafar Hj. Don
- KAUNSELING *ONLINE* DALAM DUNIA TERHUBUNG ...86-94
Zainab Ismail
- PENYEBARAN PEMIKIRAN BERKAITAN AKIDAH DALAM LAMAN SESAWANG SISTERS IN ISLAM (SIS) ...95-109
Fatin Nabillah Md Bahrudin, Hasanah Abd Khafidz & Zulkefli Aini
- GUIDED FAITH AND LEADERSHIP DEVELOPMENT IN RISALE-I NUR ...110-118
Mohamed Mohamed Tolba Said, Krishnan Umachandran & Adnan Abd Rashid
- THE APPROACH OF TAFAKKUR IN SIRAH EDUCATION ... 119-130
Tengku Nor Husna Tengku Jamil, Hasanah Khafidz & Khazri Osman

Al-Hikmah 10 (2) 2018: 54-69

Elemen *Siyasi* Dalam Huraian Hadis Gerakan Dakwah: Pendekatan Sayyid Muhammad Nuh (1946-2007)

The Element of *Siyasi* in The Explained of Hadis in Dakwah Movement: The Approach of Sayyid Muhammad Nuh (1946-2007)

MUHAMMAD ARIF YAHYA

ABSTRAK

Pendekatan huraian hadis oleh seseorang sarjana adalah berdasarkan aliran yang dipegang serta matlamat dan objektif yang ingin diketengahkan. Pimpinan gerakan dakwah khususnya yang beraliran *al-haraki* (gerakan Islam semasa) memiliki metode dalam huraian hadis ini terutamanya dalam membincangkan isu-isu semasa. Salah satu isu semasa tersebut adalah *siyasah* (politik). Sayyid Muhammad Nuh merupakan tokoh dakwah semasa yang mengemukakan huraian hadis dengan pendekatan *dakwah harakiyyah*. Kajian ini bertujuan untuk melihat elemen *siyasi* dalam huraian hadis yang dikemukakan oleh Sayyid Muhammad Nuh di dalam karya-karyanya. Karya-karya beliau yang dipilih iaitu *Tawjihat Nabawiyyah 'ala al-Tariq, Afat ala al-Tariq* dan karya *Min Akhlaq al-Nasr fi Jiy al-Sahabah*. Metodologi yang digunakan dalam kajian ini ialah metode kualitatif dengan menganalisis karya-karya yang berkaitan dengan tajuk perbincangan. Hasil kajian mendapati bahawa huraian hadis yang diketengahkan oleh Sayyid Muhammad Nuh adalah berdasarkan dakwah *harakiyyah* khususnya gerakan Ikhwan Muslimin. Hadis-hadis yang dikaji adalah berkaitan tuntutan berada di dalam jamaah serta janji kemenangan kepada umat Islam yang telah dikaitkan dengan elemen *siyasi* dalam huraian hadis tersebut. Kajian juga mendapati bahawa pendekatan ini turut dipengaruhi tujuh *maratib al-amal* yang telah digagaskan dalam dakwah Ikhwan Muslimin oleh Hasan al-Banna.

Kata kunci: Siyasi, Hadis, Sayyid Muhammad Nuh, Gerakan Dakwah, Al-Haraki

ABSTRACT

The approach to the description of a hadis by a scholar is based on the flow that is held and the goals and objectives that are to be highlighted. The leader of the

da'wah movement, especially *al-haraki*, also has methods in the description of the hadis, especially in discussing current issues. One such current issue is the *siyasi* (politic). Sayyid Muhammad Nuh is the current da'wah leader who presented the description of the hadis with the approach of dakwah *harakiyyah*. This study aims to look at the elements of *siyasi* in the description of the hadis presented by Sayyid Muhammad Nuh in his works. His chosen works which are *Tawjihat Nabawiyyah 'ala al-Tariq*, *Afat ala al-Tariq* and the work of *Min Akhlaq al-Nasr fi Jiy al-Sahabah*. The methodology used in this study is a qualitative method by analyzing the works related to the topic of discussion. The findings show that the description of the hadis highlighted by Sayyid Muhammad Nuh is based on da'wah *harakiyyah* especially the *Ikhwan Muslimin*'s movement. The hadis studied are related to the claims in the congregation and the promise of victory to Muslims is also associated with the elements of *siyasi* in the description of the hadis. The study also found that this approach was influenced by seven of *maratib al-amal* that has been idealized in the *Ikhwan Muslimin* by Hasan al-Banna.

Keywords: *Siyasi, Hadis, Sayyid Muhammad Nuh, Da'wah Movement, Al-Haraki*

PENDAHULUAN

Politik tidak dapat dipisahkan daripada perbincangan dalam gerakan dakwah kerana ia merupakan salah satu wasilah untuk penyebaran dakwah. Al-Qaradawi ketika menyentuh tentang pendekatan Hasan al-Banna dalam membincangkan tajuk Hijrah Rasulullah SAW adalah tidak terhenti aspek tarbiah peribadi semata, tetapi bergerak kearah penguasaan negara dan daulah (Yusuf al-Qaradawi : 2015). Gerakan dakwah tidak hanya memainkan peranan dalam menyentuh pentarbiahan yang bersifat *zatiyyah* (pembentukan peribadi) semata-mata. Gerakan dakwah seharusnya memainkan peranan secara lebih meluas termasuk penglibatan dalam politik sebagai salah satu wasilah dan medan dalam penyebaran dakwah kepada masyarakat. Selain dalil al-Quran, dalil hadis juga dijadikan sebagai dalil rujukan oleh tokoh-tokoh dakwah gerakan Islam di samping pendekatan dalam membina keperibadian pendakwah dan membina jamaah berasaskan sirah Rasulullah SAW (Munir al-Ghadban : 1998).

ELEMEN SIYAS/DALAM GERAKAN DAKWAH

Siyasah atau politik merupakan salah satu wasilah dalam mencapai matlamat gerakan dakwah. Gerak kerja dalam lapangan politik merupakan salah satu aspek penting yang difokuskan dalam gerakan dakwah semasa. Menurut Ali Abd al-Halim Mahmud (1992), tarbiah yang dibentuk dalam

gerakan dakwah Ikhwan Muslimin meletakkan lapangan politik sebagai salah satu lapangan yang ditekankan dalam pembentukan. Matlamat utama dalam gerakan dakwah ialah pentarbiahan masyarakat kearah didikan Islam itu sendiri namun medan politik dijadikan sebagai salah satu wasilah kearah mencapai matlamat tarbiah tersebut. Khilafah atau pemerintah yang didefinisikan sebagai pengganti tugas rasul dalam menjaga agama dan mentadbir dunia berpaksikan agama (al-Mawardi:1989, 3) menggambarkan kepentingan pentarbiahan individu seperti yang dilaksanakan dalam gerakan dakwah. Wacana baru dalam gerakan Islam semasa juga banyak melihat isu politikal Islam sebagai amat relevan dan signifikan kepada perkembangan dan hala tuju gerakan Islam pada masa depan (Maszlee Malik & Zulkifli Hasan : 2016).

SAYYID MUHAMMAD NUH DAN KETOKOHANNYA DALAM BIDANG HADIS DAN DAKWAH

Sayyid Muhammad Nuh dilahirkan di 'Uzbah al-Siba'i, daerah Kafr al-Shaykh, Mesir pada 23 Jamadil Awwal 1365, bersamaan 24 April tahun 1946M (al-Husayn 2010). Dibesarkan di kampung dalam keluarga yang cukup sederhana dan miskin. Beliau berjaya menamatkan hafalan al-Quran sewaktu usianya 8 tahun. Setelah itu, beliau menyambung pengajian di Ma'ahad al-Azhari al-Ibtida'i di Kafr al-Shaykh. Kemudian memasuki peringkat menengah di Ma'ahad al-Mahallah al-Azhari al-Thanawi. Ketika di alam persekolahan menengah lagi, Sayyid Nuh banyak mengikuti program tasawuf dari beberapa orang gurunya, antaranya 'Abd al-Salam Abu al-Fadl, yang merupakan guru beliau dalam mengesani jiwa dan kerohaniannya. Teman rapat dan rakan seperjuangan Sayyid Nuh ketika berguru dengan 'Abd al-Salam Abu al-Fadl ialah Yahya Ismail yang kemudiannya berperanan dalam memperkenalkan kepada Sayyid Nuh, dakwah haraki Ikhwan Muslimin (Ubudah Sayyid Nuh 2012). Di dalam bidang akademik, minat Sayyid Nuh begitu mendalam dalam bidang pengajian hadis dan mendorongnya untuk melanjutkan pelajaran sehingga ke peringkat Ph.D dalam bidang ini. Beliau menamatkan ijazah pertama di Universiti al-Azhar pada tahun 1971M (al-Husayn 2010). Kemudian melanjutkan pelajaran ke peringkat Sarjana dan berjaya menamatkan pengajiannya pada tahun 1973 dengan disertasi kajian bertajuk Perkahwinan Rasulullah SAW dengan Zaynab binti Jahsy; Menolak Tohmahan Sekitar Perkahwinan itu berdasarkan Manhaj Golongan Muhibbin. Kemudian beliau melanjutkan pelajaran ke peringkat Ph.D

dan berjaya menamatkan pengajiannya pada tahun 1976 dengan tajuk tesis kajian : “*Al-Hafiz Abu al-Hajjaj Yusuf al-Mizzi dan Kesungguhannya dalam Penulisan Tahdhib al-Kamal*”. Tesis ini telah meraih tempat cemerlang (mumtaz). Sayyid Muhammad Nuh telah menunjukkan ketokohnya dalam menyerlahkan sumbangan al-Hafiz al-Mizzi melalui penghasilan tesis Ph.D ini. Hasil penemuan kajian bagi tesis ini juga telah memberikan suatu gambaran yang jelas kepada penuntut ilmu hadis pada ketika itu, khususnya di Universiti al-Azhar sendiri dalam memahami dengan lebih baik kandungan kitab *Tahdhib al-Kamal* (Yahya Ismail 2012).

Penglibatan beliau dalam gerakan dakwah Ikhwan Muslimin pada mulanya ketika beliau mula berjinak mengikuti penulisan ‘Umar al-Tilmisani di dalam Majallah al-Da’ wah al-Ikhwaniyyah. ‘Umar Tilmisani adalah merupakan Mursyidul Am ketiga Ikhwan Muslimin setelah kematian Mursyidul Am yang kedua, iaitu Hasan al-Hudaybi pada tahun 1973. Di samping membaca dari tulisan-tulisan haraki Majallah al-Da’ wah al-Ikhwaniyyah ini, beliau juga mengikuti program-program yang dikendalikan oleh Shaykh Muhammad al-‘Adawi di perkampungan Mahallah Abu ‘Ali, Mahallah al-Kubra, Mesir (Ikhwan wiki 2013). Sayyid Nuh mengikuti program ini bersama-sama dengan teman rapatnya Yahya Isma’il yang ketika itu banyak menyalurkan fikrah-fikrah Ikhwan ke dalam kehidupan Sayyid Nuh (Yahya Ismail 2012). Sejak mengikuti program tersebut dan terkesan dengan sentuhan Shaykh Muhammad al-‘Adawi, beliau mula melibatkan diri secara aktif dalam gerakan dakwah Ikhwan Muslimin (Wasfi Asyur 2013). Sayyid Muhammad Nuh keluar dari Mesir tahun 1981 pada asalnya memenuhi jemputan sebagai Pensyarah Pelawat di Universiti Qatar. Pada ketika itu juga, keadaan di Mesir tidak stabil dan ramai dari anggota Ikhwan Muslimin telah ditangkap dan dipenjarakan. Sayyid Muhammad Nuh juga merupakan salah seorang anggota Ikhwan yang disenaraikan dalam perintah penangkapan tersebut. Kalauolah tidak kerana panggilan sebagai pensyarah jemputan ke Universiti Qatar tersebut, Sayyid Muhammad Nuh kemungkinan akan ditangkap dan dipenjaran bersama anggota Ikhwan yang lain. Beliau telah berkhidmat di Universiti Qatar selama setahun (1981-1982). Kemudian beliau merantau di beberapa Universiti di Emiriah dan Dubai bermula tahun 1982 dan berakhir di Universiti Kuwait setelah menetap di sana bermula tahun 1993 sehingga beliau meninggal dunia tahun 2007 (Yahya Ismail 2012; al-Husayn 2010). Penulis mengemukakan beberapa karya hadis Sayyid Muhammad Nuh dengan mengkaji metode penulisan serta pendekatan beliau dalam penghuraian hadis-hadis ini dari aspek *al-haraki* :

Tawjihat al-Nabawiyyah ‘ala al-Tariq

Kitab *Tawjihat Nabawiyyah ‘ala al-Tariq* merupakan sebuah kitab yang menghimpunkan hadishadis bimbingan dan petunjuk untuk para pendakwah dalam meniti liku-liku jalan dakwah. Sayyid Muhammad Nuh memilih 40 teks hadis untuk dihuraikan satu persatu dan dibincangkan setiap kandungannya dalam konteks dakwah dan harakah. Cetakan pertama bagi kitab ini ialah cetakan Dar al-Wafa, Mansurah, Mesir yang diterbit pada tahun 1992. Penulis merujuk cetakan Dar al-Yaqin, Mansurah, Mesir, yang diterbit pada tahun 1998. Kitab ini mengandungi 3 juzuk dan dicetak dalam 2 jilid bagi versi cetakan Dar al-Yaqin. Kitab ini turut diterjemahkan ke bahasa Indonesia (jilid pertama) dan dijual di pasaran Malaysia dengan tajuk buku Pesan-Pesan Nabi SAW: Syarah Hadits dalam Perspektif Dakwah dan Tarbiah, terbitan an-Nadwah, Jakarta, tahun terbitan 2004 dan diterjemah oleh Fadhli Bahri (2004). Antara metode penulisan Sayyid Nuh dalam menyusun kitab ini seperti berikut:

- i. Memulakan hadis yang pertama berkaitan dengan Seorang Mukmin Yang Kuat Lebih Dikasih oleh Allah Berbanding Seorang Mukmin Yang Lemah.
- ii. Menghuraikan hadis-hadis Nabi SAW dengan dalil-dalil yang ma’thur.
- iii. Tidak meletakkan tajuk pada setiap permulaan hadis. Hanya sekadar menyebutkan nombor hadis, sebagai contoh hadis pertama : "الحديث الأول :
- iv. Menfokuskan kepada penyatuan saf umat Islam. Mengelak dari banyak berbincang tentang permasalahan fiqh dan perbezaan pandangan ulama.
- v. Mengemukakan sebahagian huraian dalam bentuk dialog dan analogi yang membantu proses pemahaman sesuatu isu.
- vi. Mengemukakan jalan penyelesaian dan alternatif dalam sesuatu permasalahan dakwah.
- vii. Membawa huraian bahawa setiap muslim adalah da’i, bertanggungjawab mengajak individu yang lain kearah ketaatan pada Allah (S.W.T) mengikut kemampuan masing-masing.
- viii. Meletakkan di setiap akhir perbincangan hadis, satu tajuk berkaitan istifadah dan pengajaran dari hadis dari sudut dakwah dan tarbiah, dengan tajuk "ما يستفاد من الحديث دعوياً وتربوياً".

Manhaj al-Rasul fi Ghars Ruh al-Jihad fi Nufus Ashabih

Karya ini ditulis oleh Sayyid Nuh bagi mengkaji metode Rasulullah SAW dalam meniupkan semangat jihad dalam diri para sahabat. Beliau menyusun karya ini dengan membahagikannya kepada dua bahagian. Bahagian pertama, melihat kepada isi kandungan dan inti sari dari metode Rasulullah SAW Manakala bahagian kedua, berkaitan uslub dan wasilah yang digunakan oleh Rasulullah SAW dalam meniupkan semangat jihad ini. Karya asal bagi kitab ini adalah cetakan Dar al-Wafa, Mansurah, Mesir, dan cetakan pertamanya telah diterbitkan pada tahun 1991. Karya ini juga turut diterjemah ke dalam bahasa Indonesia dengan tajuk Metode Rasulullah SAW dalam Meniupkan Semangat Roh al-Jihad dalam Diri Para Sahabat. Antara metode penulisan kitab ini seperti mana berikut:

- i. Membahagikan kitab kepada dua bahagian, bahagian pertama, melihat kepada isi kandungan dan inti sari dari metode Rasulullah SAW Manakala bahagian kedua, berkaitan uslub dan wasilah yang digunakan oleh Rasulullah SAW dalam meniupkan semangat jihad.
- ii. Meletakkan sub topik berkaitan metode Rasulullah SAW dalam kedua-dua bahagian, iaitu lima topik dalam bahagian pertama dan lima topik dalam bahagian kedua.
- iii. Mukaddimah kitab dimulakan dengan tajuk Hakikat Jihad yang Ditiupkan oleh Rasulullah SAW ke dalam Diri Para Sahabat, sebelum mengemukakan perbincangan ke atas kedua-dua bahagian berkaitan manhaj Rasulullah SAW.
- iv. Mengemukakan ayat-ayat al-Quran bagi menyokong kenyataan di samping sirah yang dinyatakan bagi menambah kefahaman.
- v. Setiap akhir tajuk perbahasan, Sayyid Nuh sering kali menyeru ke arah kefahaman jihad yang betul dan sepatutnya difahami dengan konsep kefahaman salafussoleh dahulu.

Min Akhlaq al-Nasr fi Jiyl al-Sahabah

Karya Min Akhlaq al-Nasr fi Jiyl al-Sahabah (Akhlaq-Akhlaq Kemenangan dalam Generasi Para Sahabat) membincangkan aspek kemenangan dalam keperibadian dan akhlak para sahabat yang telah dididik oleh Nabi SAW Karya ini telah dicetak dengan cetakan Dar Ibn Hazm, Beirut, Lubnan, tahun cetakan 1994. Karya ini juga telah diterjemah ke dalam bahasa Indonesia dengan karya terjemahan bertajuk Berguru

Kepada Sahabat Nabi SAW, cetakan Era Intermedia, Solo, Indonesia. 2008. Penterjemahnya ialah Solihin. Antara metode penulisan bagi kitab ini: a. Terdapat 14 akhlak kemenangan para sahabat yang disenaraikan oleh Sayyid Nuh di dalam kitab ini. b. Sayyid Muhammad Nuh menghuraikan setiap akhlak kemenangan dalam diri para sahabat dengan dalil-dalil ma`thur (al-Quran dan al-Hadis). c. Kemenangan yang dimaksudkan oleh Sayyid Nuh adalah suatu pendekatan dan kefahaman yang syumul. Bukan hanya kemenangan yang dilihat dari sudut zahir semata-mata, tetapi akhlak kemenangan dari sudut spiritual (ruhi) tetap sama dititik beratkan. Malah dari sudut strategi dan persediaan ke arah mencapai kemenangan tersebut turut ditekankan oleh Sayyid Nuh di dalam karya ini. d. Di akhir setiap perbincangan berkaitan akhlak kemenangan para sahabat, Sayyid Nuh akan mengemukakan cadangan dan saranan beliau bagi mengatasi permasalahan yang timbul khususnya berkaitan sikap umat Islam kini yang jauh dari meraih kemenangan seperti mana para salafussoleh.

Ini adalah sebahagian karya-karya hadis yang dihasilkan oleh Sayyid Muhammad Nuh dalam membincangkan isu dakwah dan gerakan Islam. Pendekatan Sayyid Muhammad Nuh dalam menghuraikan hadis-hadis di dalam karya-karya ini kelihatan memiliki pendekatan tersendiri khususnya kefahaman *al-haraki* yang diketengahkan dalam perbincangan dan huraian. Salah satu elemen *al-haraki* dalam huraian hadis oleh Sayyid Muhammad Nuh ini ialah berkaitan politik.

ELEMEN POLITIK DALAM HURAIAN HADIS SAYYID MUHAMMAD NUH

Politik merupakan salah satu elemen yang dikemukakan oleh Sayyid Muhammad Nuh dalam karya-karya hadis terutamanya perbincangan mengenai dakwah dan jamaah. Hadis-hadis yang dikemukakan biarpun tidak secara langsung mengandungi perkataan politik atau negara, namun di dalam huraian (syarah hadis) yang diketengahkan oleh Sayyid Muhammad Nuh turut diselitkan elemen *siyasi* tersebut. Karya-karya Sayyid Muhammad Nuh yang dikenalpasti mengemukakan perbincangan tersebut ialah kitab *Tawjihat Nabawiyyah 'ala al-Tariq, Afat ala al-Tariq* dan *Min Akhlaq al-Nasr fi Jiy al-Sahabah*. Contoh hadis yang dipetik daripada karya-karya Sayyid Muhammad Nuh ini adalah berkaitan dengan tuntutan untuk berada di dalam jamaah dan tidak bergerak secara keseorangan di dalam penyampaian dakwah. Selain itu, hadis berkaitan

kemenangan untuk umat Islam yang dinyatakan oleh Rasulullah SAW natijah daripada usaha dakwah yang disampaikan. Hadis berkaitan larangan berpisah daripada jamaah dipetik daripada karya *Tawjīhat Nabawiyyah ‘ala al-Tariq* sepetimana berikut :

مَنْ فَارَقَ الْجَمَاعَةَ شِبْرًا فَقَدْ خَلَعَ رِنْقَةَ الإِسْلَامِ مِنْ عُنْقِهِ.

Maksudnya: “Daripada Abu Dhar r.a katanya bahawa Rasulullah SAW bersabda, “Sesiapa yang memisahkan diri dari jamaah walaupun sejengkal maka bererti dia telah melepaskan ikatan Islam dari tengukunya”. (Hadis ini diriwayatkan oleh Abu Da’ud di dalam Sunannya, Kitab al-Sunnah, Bab fi Qatl al-Khawrij, no hadis 4758. Hadis ini dihukum dengan status sahih oleh al-Albani. (Sulayman bin al-Asy‘ath Abu Da’ud al-Sijistani : t.t, 4:241, Sahih Sunan Abi Da’ud. Nasir al-Din al-Albani, Sahih Sunan Abi Da’ud, 3:167).

Hadis yang kedua berkaitan tuntuan untuk berada di dalam jamaah dan menjauhi perpecahan dipetik daripada karya *Afat ala al-Tariq* sepetimana berikut.

عَنْ أَبْنَىْ عُمَرَ قَالَ : حَطَبَنَا عُمَرٌ بِالْجَابِيَّةِ فَقَالَ : يَا أَيُّهَا النَّاسُ ، إِنِّي فُمْتُ فِيْكُمْ كَمْعَامَ رَسُولِ اللَّهِ صَلَّى اللَّهُ عَلَيْهِ وَسَلَّمَ فِيْنَا ، فَقَالَ : أُوصِيْكُمْ بِأَصْحَابِيِّ ، ثُمَّ الَّذِينَ يَلْوَهُمْ ، ثُمَّ يَفْسُوْلُوكُمْ الْكَذِيبَ حَتَّىْ يَجْلِفَ الرَّجُلُ وَلَا يُسْتَحْلِفُ وَيَشْهَدَ الشَّاهِدُ وَلَا يَسْتَشْهِدُ ، أَلَا لَا يَجْلُونَ رَجُلًا بِإِمْرَأَةٍ إِلَّا كَانَ ثَالِثُهُمَا الشَّيْطَانُ ، عَلَيْكُمْ بِالْجَمَاعَةِ وَإِيَّكُمُ الْفُرْقَةَ ، فَإِنَّ الشَّيْطَانَ مَعَ الْوَاحِدِ ، وَهُوَ مِنَ الْإِثْنَيْنِ أَبْعَدُ ، مَنْ أَرَادَ بُجُوحَةَ الْجَنَّةِ فَلِيَلْرُمِ الْجَمَاعَةَ ، مَنْ سَرَّهُ حَسَنَتُهُ وَسَاءَهُ سَيِّئَتُهُ فَدَلِيلُكُمُ الْمُؤْمِنُ .

Maksudnya: “Daripada Ibn Umar r.a katanya : Umar telah menyampaikan khutbah kepada kami di al-Jabiyyah dengan berkata : Wahai sekalian manusia, sesungguhnya saya berdiri disini sepetimana kedudukan Rasulullah SAW bersama kita lantas bersabda “Saya berwasiat kepada kalian dalam urusan sahabtu, kemudian orang-orang setelah mereka (Tabi’in) dan orang-orang setelah mereka (Tabi’ Tabi’in). Kemudian tersebarnya kedustaan sehingga seseorang akan bersumpah tanpa diminta dan memberikan persaksian tanpa diminta. Tidak akan bersendirian diantara seorang lelaki dan perempuan kecuali yang

ketiganya adalah syaitan. Hendaklah kalian berpegang kepada jamaah dan jangan sesekali berpecah belah, kerana syaitan akan bersama mereka yang bersendirian dan syaitan akan lebih jauh jika berdua. Sesiapa yang inginkan bahagian di tengah syurga maka berpeganglah kepada jamaah. Sesiapa yang merasai keseronokan ketika melakukan kebaikan dan merasai kegelisahan (susah hati) ketika melakukan kejahatan maka itulah seorang mukmin". (Hadis ini diriwayatkan oleh al-Tirmidhi di dalam Sunannya, Kitab Abwāb al-Fitan, Bab Mājā'a fī Luzūm al-Jamā'ah, no hadis 2165. Al-Albānī menilai hadis ini dengan hadis : Ṣaḥīḥ).

Hadis yang ketiga adalah berkaitan kemenangan umat Islam hasil usaha dakwah yang dikerjakan dipetik daripada karya *Min Akhlak al-Nasr fi Jiyāl al-Sahabah* sepertimana berikut.

عَنْ خَبَّابِ بْنِ الْأَرَاتِ، قَالَ: شَكَوْنَا إِلَى رَسُولِ اللَّهِ صَلَّى اللَّهُ عَلَيْهِ وَسَلَّمَ، وَهُوَ مُتَوَسِّدٌ بُرْدَةً لَهُ فِي ظَلِيلِ الْكَعْبَةِ، فُلِنَا لَهُ: أَلَا تَسْتَنْصِرُ لَنَا؟ أَلَا تَدْعُونَا اللَّهَ لَنَا؟ قَالَ: كَانَ الرَّجُلُ فِيمَنْ قَبْلَكُمْ يُخْفَرُ لَهُ فِي الْأَرْضِ، فَيُجْعَلُ فِيهِ فَيْحَاجَةً بِالْمِلِيشَارِ، فَيُوَضَّعُ عَلَى رَأْسِهِ، فَيُنَتَّقُ بِإِثْنَيْنِ، وَمَا يَصُدُّهُ ذَلِكَ عَنْ دِينِهِ، وَيُمْشَطُ بِأَمْشَاطِ الْخَدِيدِ مَا دُونَ لَحْمِهِ مِنْ عَظِيمٍ أَوْ عَصِيبٍ، وَمَا يَصُدُّهُ ذَلِكَ عَنْ دِينِهِ، وَاللَّهُ لَيَمْنَنَ هَذَا الْأَمْرُ حَتَّى يَسِيرَ الرَّاكِبُ مِنْ صَنْعَاءَ إِلَى حَضْرَ مَوْتٍ لَا يَخَافُ إِلَّا اللَّهُ أَوِ الدِّئْبَ عَلَى عَنْمِهِ وَلَكِنَّكُمْ تَسْتَعْجِلُونَ.

Maksudnya: "Daripada Khabbāb bin al-Arat r.a katanya: Kami telah mengadu pada Rasulullah SAW sedang Rasulullah sedang berbaring di bawah naungan Kaabah berbantalkan serban, maka kami bertanya "Apakah tuan tidak berdoa memohon kemenangan bagi pihak kita? Adakah tuan tidak berdoa bagi pihak kita?. Maka berkata Rasulullah SAW: "Sesungguhnya seorang lelaki dari golongan sebelum kamu ditangkap lantas digali lubang dan ditanam di dalamnya, kemudian dibawa datang gergaji lalu digergaji kepalanya sehingga terbelah dua dan disikat badannya dengan sikat besi sehingga meluruhkan daging dan tulangnya, namun demikian tidak memalingkan ia dari agamanya. Demi Allah, nescaya Allah menyempurnakan urusan ini (agama Islam), sehingga musafir dari San'a ke Hadra Maut tidak lagi merasa takut melainkan hanya kepada Allah atau serigala yang memakan kambingnya, akan tetapi kamu ini adalah golongan yang gopoh". (Hadis ini diriwayatkan oleh Imam Bukhari, kitab al-Manaqib, no hadis 3612).

Di dalam kitab *Tawjīhat Nabawiyyah ‘ala al-Tarīq*, Sayyid Muḥammad Nūḥ menyentuh beberapa huraian terhadap “*Hadis Jamaah*” yang menunjukkan kepada unsur politik dan kekuasaan di dalam huraian hadis tersebut. Beliau mengemukakan perbahasan bertajuk “*Kewajipan Melazimi Jamaah Dalam Perspektif Islam*” dan menyebutkan beberapa dalil *syara’* selain dari ayat al-Quran dan hadis-hadis Nabi SAW yang menekankan tentang kelaziman berada di dalam jamaah. Sayyid Muḥammad Nūḥ menyebutkan bahawa manhaj yang diaplikasikan oleh Rasulullah SAW dalam menguatkan negara Islam pertama dan keteguhan (*al-tamkīn*) untuk agama Allah di atas muka bumi ini adalah bermula dengan membentuk jamaah atau kelompok yang akan menyokong pembinaan negara Islam kelak. Perkara inilah yang ditekankan oleh Sayyid Muḥammad Nūḥ ketika menyebutkan manhaj Rasulullah SAW dalam pembinaan kerajaan Islam di Madinah bermula dari pembinaan jamaah dan kelompok pendokong yang telah membantu proses pembinaan negara Islam tersebut. (Sayyid Muhammad Nuh : 1998, 135-136). Munir al-Ghadban turut menyebutkan perkara yang sama ketika membincangkan *al-manhaj al-haraki* di dalam Sirah Nabi SAW Beliau menyebutkan perbezaan antara tempoh pembinaan tarbiah individu di Mekah (*fatrah makkiyyah*) dan pembinaan negara Islam di Madinah (*fatrah madaniyyah*). (Munir al-Ghadban : 1998, 2009).

Selain itu, Sayyid Muḥammad Nuh amat menekankan aspek pembinaan kelompok pendokong ini sebelum daripada pembinaan negara Islam iaitu ketika beliau menyebutkan metode Rasulullah SAW dalam menegakkan hukum Allah di atas muka bumi ini. Antara yang utama dinyatakan oleh beliau ialah proses mencari dan bekerja ke arah mewujudkan individu-individu muslim dengan didikan Islam serta menghimpunkan segala unsur kebaikan dan menjauhi segala ciri-ciri kejahanatan selain berkeahlilan dalam mendapatkan bantuan dan kemenangan dari Allah SWT (Sayyid Muhammad Nuh : 1998, 150).

Perkara ini selari dengan kajian yang telah dibuat oleh Tawfiq al-Wā‘ī mengenai *al-dawlah al-Islāmiyyah* (Kerajaan Islam) yang dikaji dari perspektif *turāth* dan semasa. Beliau menyimpulkan tiga rukun utama dalam pembinaan kerajaan Islam, iaitu ; **Rukun pertama**, *tarbiah al-sya‘ab* atau pembinaan kelompok rakyat pendokong yang dididik dengan keimanan atau disebut sebagai *qā‘idah sulbah*. *Qā‘idah sulbah* secara umumnya bermaksud tonggak dan tulang belakang bagi sesuatu perkara. *Qā‘idah sulbah* dalam dakwah adalah terdiri di kalangan penggerak dakwah yang merupakan tulang belakang bagi dakwah itu sendiri. Munir

al-Ghaḍbān ketika mengkaji *al-manhaj al-ḥaraki* dalam Sirah Nabawiyyah menyebutkan bahawa Rasulullah SAW sebelum berdakwah secara terang-terangan (*da’wah jahriyyah*) telah mendidik dan membina *qā’idah šulbah* ini di kalangan para sahabat dan kumpulan ini telah mempertahankan dakwah Rasulullah SAW sehingga tiada dikalangan mereka yang murtad atau keluar dari Islam dengan tetap mempertahankan dakwah Islam bersama Rasulullah SAW. Munir al-Ghaḍbān menyebutkan pembinaan *qā’idah šulbah* atau *al-nuwwah al-šulbah* ini sebagai salah satu ciri yang wujud dalam *al-manhaj al-ḥaraki* di dalam Sirah iaitu dalam fasa *Siriyyah al-Da’wah wa Siriyyah al-Tanzīm* (Dakwah secara rahsia dan pembinaan organisasi secara rahsia). (Munir al-Ghaḍbān : 1998, 25-28). **Rukun kedua**, pencarian tanah atau kawasan dalam pembinaan *al-dawlah* (kerajaan Islam). **Rukun ketiga**, perlombagaan dan undang-undang. Rukun pertama yang disebutkan oleh Tawfiq al-Wā‘i adalah selari dengan maksud pembinaan jamaah yang disebutkan oleh Sayyid Muḥammad Nūḥ sebelum pembinaan *al-dawlah Islamiyyah*.

Huraian terhadap hadis tersebut yang turut menyentuh tentang perihal pembinaan kerajaan Islam adalah bagi menekankan tentang kekuatan sesebuah kerajaan Islam adalah bermula dengan didikan setiap individu untuk berada di dalam jamaah dan kesatuan. Kekuasaan politik juga akan menjadi lemah jika jamaah yang dibentuk tiada daya kekuataannya dari sudut kesatuan dan kesefahaman. Oleh yang demikian, salah satu perkara yang diketengahkan oleh Sayyid Muḥammad Nūḥ melalui huraian terhadap hadis melazimi jamaah ini ialah berkaitan kekuasaan politik dan manhaj Rasulullah SAW dalam pembinaan negara Islam bermula dengan pembinaan jamaah.

Selain itu, perbahasan yang dikemukakan oleh Sayyid Muḥammad Nūḥ di dalam huraian terhadap hadis yang sama di bawah tajuk “*Ciri-ciri Penting Sebuah Jamaah Yang Patut Diikuti*” telah menyebutkan ciri keduanya berkaitan dengan politik dan kekuasaan iaitu “..mengikuti jalan yang sama yang pernah dilalui oleh Rasulullah SAW dalam usaha membebaskan kehidupan manusia dan menegakkan hukum Allah di atas muka bumi..”. (Sayyid Muḥammad Nuh : 1998, 149). Menegakkan hukum Allah di atas muka bumi tersebut adalah dengan maksud kerajaan dan pemerintahan yang memiliki kuasa dan kekuatan untuk menegakkan undang-undang Allah SWT dan amat berkait rapat dengan aspek politik dan kekuasaan.


Di dalam kitab *Afāt ‘ala al-Tariq*, Sayyid Muḥammad Nūḥ turut menyentuh perkara yang sama dan menekankan tentang manhaj yang perlu dikuasai dalam pembinaan kerajaan Islam serta pembentukan individu

muslim yang perlu digarap dari manhaj yang pernah dibawa oleh Nabi SAW. Beliau menyentuh perkara tersebut ketika membahaskan tentang penyakit (*Āfah*) yang keempat bertajuk : *al-'Uzlah* (Pengasingan diri). Beliau mengemukakan hadis mengenai amaran dari Rasulullah SAW supaya tidak mengasingkan diri dari kelompok jamaah seperti yang telah dinyatakan dalam teks hadis di atas. Antara perbincangan yang dikemukakan oleh Sayyid Muhammad Nūḥ berkaitan tajuk *al-'Uzlah* tersebut iaitu perbahasan tentang “*Kaedah dan Cara Bagi Mengatasi dan Menjauhi Sifat al-'Uzlah*”. Antara kaedah yang ditekankan oleh Sayyid Muhammad Nūḥ ialah “*Menguasai hakikat manhaj yang pernah dilaksanakan oleh Rasulullah SAW dalam pembentukan dan pembinaan negara Islam pertama*”. (Sayyid Muhammad Nuh : 1999, 93). Melalui penguasaan hakikat manhaj tersebut, seseorang pendakwah akan dapat menghindari dari *Āfah al-'Uzlah* dan perkara tersebut perlu bermula dengan menetapkan diri bersama jamaah terlebih dahulu sebagai mengikuti panduan dan petunjuk dari Rasulullah SAW dalam perkara ini. (Sayyid Muhammad Nuh : 1999, 93). Huraian yang dikemukakan oleh Sayyid Muhammad Nuh ini menunjukkan elemen *siyasi* dalam huraian hadis berkaitan jamaah tersebut dan pendekatan ini selari dengan huraian hadis yang sama dalam kitab *Tawjihat Nabwiyyah* di atas.

Begitu juga di dalam karya beliau, *Min Akhlāq al-Naṣr fī Jiyl al-Šahābah*, Sayyid Muhammad Nūḥ menyebutkan antara akhlak para sahabat yang membawa kemenangan dalam kehidupan mereka adalah keyakinan akan kemenangan dan penguasaan (pemerintahan) di atas muka bumi ini yang telah dijanjikan melalui pengkhabarannya oleh Allah SWT dan Rasul-Nya SAW. Berdasarkan ayat-ayat al-Quran seperti surah al-Šaf ayat 8-9, Surah al-Nūr ayat 55, Surah Ghāfir ayat 51 dan Surah al-Šāffāt ayat 171-173 yang menyebutkan tentang janji kemenangan tersebut. Sayyid Muhammad Nūḥ juga mengemukakan beberapa hadis Nabi SAW yang menyebutkan tentang perihal kemenangan yang mampu diperolehi oleh para sahabat sekiranya dipenuhi syarat-syarat dalam meraih kemenangan tersebut. Antaranya hadis yang menyentuh tentang keteguhan berpegang kepada kebenaran di kalangan umat Baginda SAW sehingga datangnya perintah Allah taala (Sahih Bukhari no hadis 3640, Abd al-Aziz Ibrahim: , 296) dan hadis berkaitan *khilafah ala al-manhaj al-nubuwah* (Sahih al-Albani, 1979, 1:8). Menurut Sayyid Muhammad Nūḥ, keyakinan yang ditanam dalam diri para sahabat ini terhadap janji Allah dan Rasul-Nya membawa kemenangan dan penguasaan mereka terhadap pemerintahan. (Sayyid Muhammad Nuh: 1994, 124). Kenyataan yang dibuat oleh Sayyid Muhammad Nūḥ di dalam karya *Manhaj al-Rasūl fī Ghars Rūḥ al-Jihād fī*

Nufūs Aṣḥābiḥ ini menggambarkan tentang konsep politik dan kekuasaan yang turut ditekankan di dalam huraian berkaitan pemahaman *harakah* dan konsep gerakan dakwah.

Dari beberapa huraian yang dikemukakan oleh Sayyid Muḥammad Nūḥ di dalam karya-karyanya ini menunjukkan bahawa beliau tidak menyebut secara khusus istilah *siyāṣī* (politik), namun perkara yang banyak dikaitkannya adalah aspek ‘*amal jamā’ī* dalam perancangan menuju ke arah pembentukan sistem politik dan pembinaan negara yang tertegak di dalamnya syariat Islam. Pemikiran dakwah yang dikemukakan oleh beliau jelas berdasarkan prinsip *al-haraki* yang menunjukkan bahawa politik dan kekuasaan merupakan salah satu peringkat (*marhalah*) yang perlu dilalui oleh sesebuah gerakan dakwah. Perkara ini selaras dengan *marātib al-amal* yang dikemukakan oleh Hasan al-Banna di dalam Himpunan Risalahnya (*Majmū‘ah al-Rasā’il*). Maratib *al-amal* yang dimaksudkan iaitu tujuh peringkat sebagaimana yang dinyatakan dalam Gambar rajah 1 berikut.



Gambar rajah 1 : *Maratib al-amal* (gerak kerja dakwah) dalam gerakan Ikhwan Muslimin (Hasan al-Banna : 2002).

Gambar rajah di atas menunjukkan pengaruh pendekatan dakwah Gerakan Ikhwan Muslimin wujud dalam pemahaman huraian hadis yang

dikemukakan Sayyid Muhammad Nuh. Walaupun tidak secara langsung Sayyid Muhammad Nuh menyebutkan *maratib al-amal* tersebut di dalam huraian-huraianya, namun perincian huraian yang dikemukakan oleh Sayyid Muhammad Nuh berkaitan tiga contoh hadis yang telah ditunjukkan memberi maksud pemahaman dakwah dan kefahaman berdasarkan pendekatan *haraki* tersebut. Pendekatan huraian yang dikemukakan ini bukanlah suatu yang bercanggah dengan pemahaman ulama hadis di dalam kitab-kitab syarah yang utama. Huraian yang dikemukakan adalah dengan pendekatan *tajdid* gerakan Islam semasa yang ingin melihat pentarbiahan individu pendakwah kearah merealisasikan tertegaknya kembali Islam melalui pelaksanaan syariat Islam serta daulah Islamiyyah sehingga akhirnya menjadi tonggak dunia seperitimana yang telah direalisasikan umat Islam sebelum ini.

KESIMPULAN

Sayyid Muhammad Nuh menghuraikan hadis-hadis berkaitan dengan dakwah dan gerakan Islam. Huraian hadis yang dikemukakan jelas menunjukkan kecenderungan huraianya berunsurkan pendekatan *haraki* (Muhammad Arif Yahya : 2016). Salah satu elemen yang dikemukakan dalam *al-manhaj al-haraki* ini ialah elemen *siyasi* yang merupakan wasilah untuk menyampaikan dan menyebarkan dakwah. Walaupun perkataan *siyasi* tidak dinyatakan di dalam hadis secara jelas hanya berkaitan hadis jamaah dan janji kemenangan umat Islam. Namun kefahaman dan kecenderungan yang dikemukakan dalam huraian hadis oleh Sayyid Muhammad Nuh ini boleh difahami maksud *siyasi* tersebut. Perkara ini dilihat pengaruh gerakan Ikhwan Muslimin berkaitan *Maratib al-Amal* yang tujuh dapat dilihat dalam huraian yang dikemukakan oleh Sayyid Muhammad Nuh ini. Pendekatan dakwah yang diketengahkan dalam Gerakan Islam seperitimana Ikhwan Muslimin ini dilihat dakwah daripada sudut pendekatan jamaah itu bukan hanya bersifat aspek kerohanian atau terhenti pada *tarbiah zatiyyah* (*tarbiah individu*) semata-mata. Bahkan peringkat didikan dan tarbiah tersebut kearah merealisasikan matlamat sehingga terbentuknya daulah Islamiyyah dan dapat meletakkan Islam di tempat tertinggi. Perkara inilah yang dikemukakan dalam huraian-huraian hadis oleh Sayyid Muhammad Nuh sebagaimana yang telah dinyatakan.

RUJUKAN

- Ali Abd Halim M. (1992), *Wasail al-Tarbiah Inda Ikhwan al-Muslimin*, cet. ke 5, Dar al-Wafa: Mansurah.
- Ali bin Khallaf I. B. (2003), *Syarh Sahih al-Bukhari Ibn Battal*, cet. ke-2, tahqiq; Abu Tamim.
- Al-Albani, M. N. D. A. (1979), *Silsilah al-Ahadiyah al-Sahihah*, cet. ke 2, Beirut: al-Maktab al-Islami, 1: 8.
- al-Albani, M. N. D. A. (1998), *Sahih Sunan Abi Da'ud*, Maktabah al-Maarif : al-Riyadh, 3:167
- Al-Banna, H., (2002), *Majmu 'ah al-Rasai'il al-Imam al-Syahid Hasan al-Banna*, al-Iskandariyyah : Dar al-Da'wah.
- Maszlee, M. & Zulkifli, H. (2016), Generasi Kedua Politikal Islam : Wacana Baru Gerakan Islam, Ilhambooks : Petaling Jaya, Selangor.
- Muhammad Arif Yahya (2014), Beberapa Isu Haraki di dalam Karya-karya Sayyid Muhammad Nuh, International Journal of Islamic Thought (IJIT), vol 5 (Jun) 2014.
- Muhammad Arif Yahya (2015), al-Manhaj al-Haraki Dalam Penulisan Sayyid Muhammad Nuh Menurut Perspektif Hadith : Aplikasi Dalam Isu-Isu Semasa Gerakan Dakwah Di Malaysia, Tesis PhD, Jabatan al-Quran dan al-Hadith, Akademi Pengajian Islam, Universiti Malaya.
- Muhammad Arif Yahya (2016), Elemen *al-Haraki* Dalam Huraian Hadis : Kajian Terhadap Pendekatan Sayyid Muhammad Nuh Dalam Penulisannya, prosiding International Muzakarah & Mu'tamar on Hadith 2016 (Imam 2016), Institut Kajian Hadith (INHAD), Kolej Universiti Islam Selangor (KUIS), conference.kuis.edu.my/imam2016/eproceeding/1004-imam-2016.pdf.
- Munir G. (1998), *al-Manhaj al-Haraki li al-Sirah al-Nabawiyyah*, cet. ke 10, al-Mansurah: Dar al-Wafa', 1998, 25-28.
- Munir G. (2009), *Manhaj Haraki* :Strategi Pergerakan dan Perjuangan Politik dalam Sirah Nabi SAW, Rabbani Press.
- Sayyid M. N. (1991), *Manhaj Ahl al-Sunnah wa al-Jama'ah fi Qadiyyah al-Taghyir bi Janibayh al-Tarawihi wa al-Da'awi*, cet ke 2, al-Mansurah ; Dar al-Wafa'.
- Sayyid M. N. (1999), *Ayat al-Tariq*, jilid 1, cetakan ke 13, Mansurah : Dar al-Wafa.

- Sayyid M. N. (1998), *Tawjihat Nabawiyyah ‘ala al-Tariq*, juzuk 1 & 2, Mansurah: Dar al-Yaqin.
- Sayyid M. N. (1994), *Min Akhlaq al-Nasr fi Jiy al-Sahabah*, Beirut : Dar Ibn Hazm.
- al-Sijistani, S. A. (t.t), *Sunan Abi Da’ud*, tahqiq: Muhammad Muhyi al-Din ‘Abd al-Hamid, Beirut : al-Maktabah al-‘Asriyyah, 4:241.
- al-Tirmidhi, M.‘I. S (1975), *Sunan al-Tirmidhi*, tahqiq dan *ta’liq* Ahmad Muhammad Syakir, Muhammad Fuad ‘Abd al-Baqi, Ibrahim Atwah Iwad, cet. ke-2, Kaherah : Mustafa al-Babi al-Halabi.
- al-Qaradawi, Y., (2015), Menuju Kesatuan Fikrah Aktivis Islam, terjemahan oleh Juanda jaya, Syabab Book Link; Bandar Baru Bangi, Selangor.
- M.Fadhli Ismail. 2003. *Peranan Masjid*. Kuala Lumpur: Dar al-Nukman.
- Mohammad Jamaluddin al-Qasimi. 1983. *Islah al-Masajid min al-Bida’ wa al-‘Awaid*, Beirut: al-Maktab al-Islami.
- Muhammad Hijazi. 2003. Jilid 2 Zaqqaziq:al-Tafsir al-Wadhih, Dār al-Tafsir. Jil 1. Beirut: Dār al-Fikr.
- Rosli. 2011. Penolong Pengarah Bahagian Takmir JAKIM. Temubual, 28 Disember.
- Sayyid Muhammad al-Ahdal. 1410. *Ifadah al-Tullab*, Jedah: Matba’ al-Haramain.
- Shuhadak Mahmud. 2002. *al-Imam Abu Ishaq al-Syirazi*, tesis sarjana Universiti Terbuka Amerika Kaherah.
- Wan Muhamad Bin Dato’ Abdul Aziz. 2007. Teks ucapan. Hotel Goldcourse, Klang, Selangor, 27 Jun.
- JAKIM,http://www.islam.gov.my/search/luceneapi_node/UNIT%20TAKMIR [23.12.2011].

*Muhammad Arif Yahya
Pusat Akidah dan Keamanan Global
Fakulti Pengajian Islam,
Universiti Kebangsaan Malaysia.
Emel: arifyahya@ukm.edu.my